

魯
之
春
秋

傳第六

魯之春秋

海鹽李氏

守土

王之栻

朱懋華等

姜圻

王正中

羅心樸等

王玉藻

顧之俊等

唐自彩

從子豫階等

俞元良

兄元禮等

守令之職號為親民是以道德齊禮移風易俗咸必由之明季魏閭亂政守令多倚附之互相貪虐培刻聚斂侵愁細民天下搖動無所措其手足至魯王時之守令所謂五日京兆耳然而倉猝之間忤悍將安閭閻如王

之栻之政遵乃父姜圻之竭力支持王正中之殺陳梧也則曰賊不可繼袁州佐之忤王之仁也則曰湖不可塞茲數臣者皆以愛民爲心有足多者至於城亡與亡與日月爭光矣作守土傳第六

王之栻字瞻卿武進人御史章子章嘗知鄞縣後殉節京師之栻至浙東募兵魯王監國令以墨衰視事授車駕主事兼攝鄞縣事制曰以爾父之遺愛望厥子之世忠之栻哭而受命爲政悉遵其父所爲未幾見江上事不可爲辭去入閩唐王仍命管車駕事已而加監軍道命宣諭江上之栻復返鄞督師大學士朱大典以檄招

之之棧乃練兵於武義兵敗入山謀再舉被執死之其
與之棧同官者則有朱懋華方召懋華字仲歲南陵人
崇禎十六年進士授定海知縣總兵王之仁納款懋華
匿不出俄聞督師錢肅樂起兵以書招之仁懋華急遣
兵助守監國擢戶部主事仍攝縣事

大兵下定海懋華正衣冠懷印望海遙拜自縊死召宣
城諸生監國授兵部司務改江山知縣衢州破召集父
老告之曰兵且至吾義不當去然不可以吾一人故致
闔城被殃若輩可迎附遂封其印冠帶北向拜赴井死
其與召同死衢州者則有王景亮伍經正鄧巖忠景亮

字武侯號僊聲吳江人與懋華同年成進士福王立授
中書舍人命典試雲南唐王擢御史巡按金衢二府兼
提學僉事奉命通好至紹興監國擢僉都御史巡撫金
衢等處駐衢州經正安福人以諸生入太學授西安知
縣唐王擢衢州知府監國加衢州兵備僉事仍知府事
巖忠江陵人崇禎九年舉鄉試授衢州推官監國擢御
史命監永豐伯軍城破經正赴井死景亮巖忠皆自縊
死之杖

國朝

賜謚忠節懋華召景亮經正巖忠俱

賜謚節愍

姜圻字紫翰號如圃崇禎九年副榜父諸生瀉里子四人圻塚城十六年蔡陽城陷瀉里帥圻坡巷戰瀉里與坡死之圻被創從積骸中負父尸而逃一門死者二十餘人禍王立追卹瀉里贈光祿寺卿謚忠肅坡贈翰林院待詔圻妻王氏塚妻孫氏坡妻左氏及瀉里女皆得祔祠南都不守圻兄弟避地至浙東魯王監國授圻象山知縣命爲瀉里立祠於象山賜祭特遣評事王家勤莅事當是時滋陽王信陽王皆駐節象山方國安王之仁索餉暴橫氏甚苦之圻上奉藩府下撫窮氓周旋

悍帥竭力支持閭閻得安甫一歲而江上師潰圻閒道
僅抵家而卒

王正中字仲搆保定人崇禎十年成進士未謁選游於
高唐州坐事論死繫獄數年刑科給事中李清理而出
之降補揚州府照磨十六年遷知長興縣事南京破避
地於紹興魯王監國授職方主事攝餘姚縣事是時公
私赤立剽奪爲豪各營入民舍根括金帛正中設兵彈
壓各營取餉必使經由於縣品覈資產裁量以應之非
是則以盜賊論總兵陳梧敗於嘉興渡海至餘姚鹵掠
鄉聚正中曰是賊也不可以縱遣兵擊之鄉聚相犄角

遂殺梧、廷議欲罪正中、職方主事黃宗義謂梧之見殺
犯衆惡也不當罪正中、上疏救之、乃止、時諸將張國柱
田仰、荆本徽各帥兵先後過姚江、舳艫蔽空、畏正中、令
嚴不敢犯其地、國柱刼定海王鳴謙復入、縱兵大掠、正
中單騎入其軍、呵止之、國柱終不得志而去、縣人倚正
中如嚴城、擢監察御史、四月、正中帥師浮海破澈浦城、
五月、宗義帥師渡江、會正中之師、劄譚山、將攻海寧、而
江上破、遂歸居越中、越六年而卒、正中不事文彩、好讀
書、精於厯學、從閩人柯仲爛於獄中、受之、乙酉秋九月
進宗義所著監國魯元年大統厯表曰、伏以上天下澤

頒朔以定民心治厯明時紀年以垂國統知大明之昭
然斯餘分之作臣正中誠惶誠恐稽首頓首竊自高
皇洗滌昏之日月頒之夏商列聖承復旦之乾坤分其
經緯豈意天崩地裂玉改鼎淪幸遇聖上龍飛會稽援
戈江左而日官失御天學無傳雖百務未遑姑次第夫
典禮乃一統爲大將肇始夫春王一雁不來竟是誰家
之天下千梅欲動難慰避地之遺民臣正中博訪異人
親求巖穴有黃宗羲者精草象之學任推算之能爰成
大明監國魯元年丙戌大統厯一卷膳寫隨表上進以
聞又別狀曰宗羲係餘姚故監察御史贈太僕卿尊素

子思宗皇帝所賜廕今方以里社子弟從軍在右僉都御史孫嘉績部下有旨優答宣付史臣江上破隱山中貧甚貸其田以食佐以醫卜丁未八月卒葬山陰與中正同官守令者則有羅心樸袁州佐朱一是帥應璧云心樸字夢章號抱靈四川營山人崇禎十年進士授寧波推官風裁凜然豪猾斂跡佐督師錢肅樂起兵監國擢知寧波府事兼參議州佐未詳其里亦佐肅樂起兵監國授鄞縣知縣王之仁之請塞東錢湖也州佐力言其不可江上破心樸蜀道阻絕游奉化之小萬竹愛其山水清曠與州佐築室同隱於剡源一是字近修號欠

卷海寧人崇禎十五年舉鄉試監國授知縣後披緇授徒以終應璧歎縣人監國授昌化知縣後不知所之

王玉藻字螺山江都人崇禎十六年成進士授慈谿知縣京師陷玉藻帥官吏士民哭臨畢並設殉節翰林院簡討汪偉位哭之三日偉故官慈令也南都破玉藻與蘇松僉事沈宸荃起兵魯王監國加御史命仍知縣事玉藻募義勇請赴江上自効乃解縣事擢兵科給事中營於江上方國安惡之不予餉玉藻曰是將剗刃於我也乃力請求罷太常卿莊元辰留之江上師潰玉藻遁

入剡溪以圖再舉知事不可爲聞舟山破始歸卒以窮死顧之俊字仲容號虛谷吳江人王藻同年進士福王立授奉化知縣督師錢肅樂起兵之俊以兵來會監國加御史仍知縣事監國航海之俊從亡入閩見鄭彩跋扈上疏劾之以剛直著後入粵從桂王死於肇慶監國至長垣其官縣令者則有鄭以佳以佳以諸生授長樂知縣科臣或劾之監國憫其清苦降級消息之旋與湔雪

唐自彩字西望達州人兵部侍郎階泰從父崇禎十二年舉於鄉授臨安知縣有廉聲多惠政尤振興文教與

訓導過俊民相得甚懽

大兵下杭州自彩歎曰臨安彈丸地以戰則無兵以守則無食且百姓素不習兵革無徒苦父老爲也冊印俱在聽邑人所爲我老矣豈復北面事二姓哉與其從子階豫攜家入梅塢俊民亦匿山中新署知縣至上言自彩受魯王監國勅集兵部署爲變大吏遣兵執自彩俾其家時八月值下下俊民語山中諸生曰我爲學官豈令孔子缺一祀乎刑牲具醴入城行禮甫初獻而執自彩之兵至見堂上幾冠博袖執笏者問何人或告之曰俊民也因前繫之俊民大罵紆於功臣山下自彩至鎖

唐大吏欲降之自彩不屈遂與從子階豫同死其妾亦從死自彩監國贈太常少卿階豫贈太常博士俊民階豫皆以諸生貢於廷俊民授臨安訓導無錫人自彩國朝

賜謚忠節俊民階豫俱

賜入忠義祠

俞元良字仲驤海寧人崇禎十六年成進士授興國州知州未赴任督師熊汝霖提兵至海寧浙西來會者萬人汝霖數陳大義元良慨然曰此事豈公一人事元良焉敢獨後汝霖遂命元良任城守司餉千戶指揮姜國

臣主兵而去魯王監國授元良監軍御史兼攝海寧知縣授國臣都督僉事

大兵破海寧國臣出戰敗走元良被執不屈死其同死者兄元禮子煒南從子翔南邑人楊逢辰許煌許旌祖千戶朱大綱蔡國瑛許義鎮無潘起龍陸韜郭忠祥郭店破諸生沈陵硤石破舉人周宗彛諸生周啟琦曹聖卿守備周雲峰云國臣世襲海寧衛所副千戶元禮字伯昭諸生與元良被執同死煒南字婉如縊死翔南字扶九出戰兵少不支縊於雙忠廟僧隱石從翔南出戰歿逢辰字國聞煌字含光旌祖字又嘉大綱字振揚善

騎射爲衆所倚汝霖簡閱將士獨奇之令守西門東門
先破大綱力戰於雙忠廟巷從騎散逸大綱入民舍拔
刀自刎死國瑛兵敗挺刀力戰死闔門遇害義被執死
於翁家步起龍兵敗自刎死韜字元聲百戶龍子諸生
未襲爵而京師陷監國勅韜招義勇從龔緒二山渡被
執死忠祥字吉臣百戶正中子以明經授州同知被執
死於馬牧港陵諸生學於查繼佐之門繼佐佐元良城
守陵戎服入見請領兵繼佐曰汝質不勝衣母自及難
陵答曰此中固自強遂別去倡義郭店出戰肩刃以死
宗葵字五重崇禎十二年舉於鄉少受業於章正宸之

門爲人有膽決尙氣節正宸數稱之曰周生吾道干城也京師陷宗彞預建坊廂水柵於硤石爲保障訖及汝霖至宗彞與諸生鄭雪舫袒臂一呼豪傑集數千人海寧破宗彞堅守如故八月望

大兵攻之宗彞單騎出被殺其弟啟琦字瑋光格鬪於里巷刃中腹腸出納腸而戰截其頸而仆聖卿雲峰戰死於水月菴雪舫亦死宗彞妻卜氏束其子明俵於懷投池死妾張氏王氏從焉雪舫字濯師嘗結萍社於硤石元良

國朝

賜謚節愍元禮宗彝啟琦俱

賜入忠義祠卜氏張氏王氏俱

賜入節孝祠

傳第七之一

魯之春秋卷十六

海鹽李聿求學

山寨一

董志寧

子士駿等

陸宇燦

弟宇燦

華夏

范兆芝等

王家勤

張夢錫

毛聚奎

浙東四明山連踰三府周圍八百里唐咸通元年裘甫之裨將劉從簡帥壯士五百奔至大蘭山據險自守大蘭山卽四明之中峰也則四明之爲山寨也由來舊矣明之亡也浙東山寨大起其後或降或竄不能盡詳惟

誰死節者姓氏彪炳天壤不可以無傳作山寨傳第七
董志寧字幼安鄞縣人狀貌挺露以名節自勵由諸生
貢於廷

大兵下杭州志寧首事倡義聞者皆笑以爲狂獨刑部
員外郎錢肅樂是其所爲其謀始遂而太僕卿謝三賓
從江上迎降歸惡聞其事欲借總兵王之仁兵殺之而
不克詳見肅樂傳魯王監國至紹興授志寧大理評事
佐肅樂視師瓜里而三賓以賄賂結外戚張國俊奸輔
田仰驟躋東閣且假勸輸義餉之名乾沒里中軍需志
寧惡之棄官歸明年江上師潰監國航海入閩次長垣

連破閩海州縣且逼福州

大兵之備浙者頗拙以備閩於是監國之遺臣結寨於
山中以僉都御史李長祥職方王翊兩軍爲盟主職方
華夏許事王家勤聯絡以應之志寧與夏及家勤計以
翊軍下寧波而已與車駕屠獻宸翻城以出因長祥以
下紹興監國之故疆可復也夏與家勤從其謀刻日部
署已定復爲三賓所譟知其事告之四出搜捕志寧踰
城而出逃至舟山監國駐舟山擢兵科都給事中時時
奉使入內地聯絡山寨諸軍以爲海上策應山寨亦感
其孤忠資糧屢屢不戒而集舟山破自刎死妻羅氏聞

之仰藥死志寧死海上陸宇燏捐金募人收其遺骸以
葬之先一日夢志寧曰關一趾奈何啟視果失一右趾
大驚束蒲補之初志寧入舟山時海道將捕其妻及其
子士駿士驥僕文周匿之捕文周之官受拷垂死不言
得免而士駿兄弟育於高字泰之家及長卒成父志長
陷不返志寧

國朝

賜謚忠節

陸宇燏字周明號簞菴鄞縣人右都御史世科子少與
錢肅樂同學補諸生南都破宇燏慟哭學宮適董志寧

至相抱而泣因謀起兵會張夢錫華夏王家勤毛聚奎
不戒而集志寧出載書於袖中宇燬遂署名紙尾計無
所出宇燬沈吟良久曰是惟錢肅樂可語乃往見肅樂
而告焉肅樂曰諾遂出而起兵而謝三賓欲敗其事貽
書總兵王之仁欲殺之而不克宇燬貽三賓書曰昔德
祐之季謝昌元贊趙孟傳誘殺袁進士以賣國執事之
家風也今幸總戎不爲孟傳遂使執事不得收昌元効
順之功以是知賣國之智亦不能保其萬全也三賓得
書咋舌而已魯王監國授監紀同知尋進按察司副使
仍監軍時馬士英匿方國安營宇燬陳士英十大罪乞

梟其首以謝江左同朝禮部尙書王思任給事中莊元
辰皆助宇燬言不報御史黃宗羲亦廷爭之卒格國安
而止宇燬嘆曰如此已不堪立國矣遽棄官歸而士英
果挾國安以爭金華江上破後宇燬入兵部侍郎王翊
馮京第軍中募兵榆林已而兵敗而思故國之志不衰
舟山之破也宇燬捐金與謀者令訪死事消息乃得首
輔張肯堂孫茂滋以俘至亟治橐餕入獄視之語其弟
宇燬使爲脫繫董志寧之殉舟山宇燬致而塋之己亥
兵部侍郎張煌言以孤軍入長江宇燬爲之飛書發使
喜形於色聞其敗也當食失箸煌言在海上數年遙仗

宇燬爲之佐壬寅降卒以宇燬之事告執至錢塘癸卯
四月宇燬已病用奇計出獄門抵寓而卒訃聞至家中
整頓其室得布囊於亂書之下發之則人頭也其弟宇
燬識其面目捧之而泣曰此故兵部侍郎王公翊頭也
初翊兵敗梟首於城闕宇燬思收葬之每徘徊其下一
日見暗中有叩首而去者跡之走入破屋宇燬曰子何
人曰吾漁人也宇燬曰子必有異無爲吾隱其人曰余
毛明山曾以卒伍事侍郎今不勝故主之感耳宇燬相
與淚涕而詣都督江漢計所以收其頭者漢善應變會
中秋競渡遊人雜沓漢紅笠握刀從十餘人登城游戲

至梟頭所問守卒曰孰戴此頭也者卒以侍郎對漢佗
怒曰嘻吾怨家也亦有是日乎拔刀擊之繩斷墮地宇
燬明山已豫立城下方是時龍舟噪甚人無回面易視
者宇燬以身蔽明山抬頭雜儔人中而去宇燬得頭祀
之書室蓋十二年矣而家人無知者至是而宇燬始瘞
之宇燬字春明號披雲宇燬崎嶇山寨之間傾家財以
佐其不足江上破棄諸生杜懋俊戰死管江其子憲琦
名列刊章宇燬藏之及長爲之授室閣部張肯堂孫茂
滋囚鄞獄中宇燬百計出之茂滋旣出而病幾死宇燬
一茶一藥無不躬親都司葉謙早夭宇燬養其母終身

其後茂滋歸而卒憲琦亦天宇燦每言之未嘗不於邑
淋漓廢餐竟日著觀日堂集董劍鶚評曰春明義冠正
襟危坐一室焚香漑花意其人爲右丞蘇州一流乃唱
歎之餘則爲羽徵變聲如風如雷不知者以爲詩殊其
人其知者以爲人寄於詩也聞者以爲知言

華夏字吉甫號嘿農鄞縣人以恩貢入太學與王家勤
齊名又同學於倪元璐黃道周劉宗周之門乙酉閏六
月浙東兵起首與董志寧等倡大義預於六狂生之目
其奉督師錢肅樂書入定海說總兵王之仁使返旆謝
三賓欲殺之而不克詳錢肅樂傳魯王監國授兵部司

務進職方主事皆不受請以布衣從軍與太僕陳潛夫
出戰牛頭灣彈從頭上過如雨不退夏雅素勁挺肅樂
亦不能盡與合十一月遂謝去明年江上師潰山寨四
起皆以恢復爲辭夏謂人心未去也時監國入閩禡牙
出師七閩震動夏謀以應之丁亥乞師於舟山總兵黃
斌卿無遠畧猶豫不應夏憤責而歸未踰時慈谿大俠
以御史馮京第海上往復書洩牽連夏捕之入獄或曰
謝三賓所爲也獄中作生謝死謝羅械破械等詩家勸
與董德欽營救出獄夏不爲懲謁都御史李長祥於
東山長祥曰吾於會稽諸城皆有腹心二鼓可集但欲

得海師以鼓動聲氣夏曰海師不足用也公何不以中
土之師速舉長祥曰此閒頗以海師爲望因其勢而用
之耳夏曰愚以爲海師必不可恃長祥曰子其強爲我
行夏乃再乞師舟山時馮京第亦在舟山力勸斌卿斌
卿曰我軍弱中土之助我者可得幾何夏曰布置已定
發不待時將軍何庸以寡助爲憂將軍之師入蛟關范
公子兆芝當以徐給事孚遠柴樓之師會可得六百人
將軍之師至鄞江楊推官文琦當以王職方翊大蘭山
之師會可得千人王評事家勤當以施公子邦煇管江
之師會可得三千人張屯田夢錫當以大蛟之師會可

得四百人而屠鴛部獻宸當以城中海道摩下陳天寵
仲謨一營之師爲內應可得千人將軍之師至慈谿馮
職方家楨當以子弟親兵會可得五百人將軍之師至
姚江李都御史長祥當已下紹興以遲將軍其東山之
寨當有使者除道以俟而張都御史煌言當以平岡之
師會可得三百人將軍之師渡曹江張都督欽臣以甬
山之師會可得二千人將軍之師急移小鹽合李都御
史軍西渡蕭山尙有石仲芳寨可得千人將軍以此衆
長驅入杭州百里之內牛酒日至何庸以寡助爲憂斌
卿猶不信夏益恨而激之斌卿大怒奮拳擊之曰吾聽

子言儻李都御史爽約吾且取子肝以餉軍然斌卿特
強許終無出師意夏歸乃復令推官楊文琦往馮京第
等益勸斌卿出師文琦曰累失期事且壞今十一月四
日直指使者至天台監司以下皆送於南渡可乘虛至
也諸道畢集以待將軍之樓船東山之兵亦以是日入
越斌卿曰諾文琦歸以告夏夏與家勤東西聯絡飛書
發使日無寧晷不知謝三賓廣行賄賂賺得夏等所賂
大蘭帛書盡得其謀由分守道陳謨告之直指秦世楨
調慈水之兵以襲大蘭定海之兵以勦姚江姚江之兵
以搗東山三道之兵皆潰捕夏得之屆期舟山兵入關

抵鄞城東之三江口諸道無至者海道孫枝秀嚴警陳
天寵仲謀亦不敢發斌卿知有備亦不敢攻而去直指
乃令知府佟廷獻大陳刑具訊夏究其黨夏慷慨獨承
曰心腹腸肝膽吾同謀也及問帛書所載楊王屠董諸
人皆言其不預知府再三拷之終不屈是日三賓亦爲
人所告下獄初三賓欲以告變之功爲求用之地不料
海道艷其富欲并殺之而盡取其室使人上書告之又
使人密語夏曰謝氏汝冤家也可力引之當先爲汝報
讐及共訊夏曰咄嗟此乃反面易行首先送款之人也
而謂其不忘故國吾死不瞑矣三賓疏劾博頴謝曰長

者長者夏在獄中鼓琴賦詩如平日自稱過宜居士或問之夏曰周公之過不亦宜乎何有於某戊子五月初二日行刑直指曰非不欲生汝奈國法何夏曰事成吾不置汝事敗汝亦不吾置也絕命有白光一縷冲天而去監國駐舟山夏贈簡討時參山寨事則有范兆芝朱金芝董劍鏢云兆芝字香谷定海人金芝字漢生劍鏢字佩公號曉山皆夏同邑人俱與夏善佐夏聯絡山寨事洩兆芝被逮刑有日矣其戚謝時符以奇計出之兆芝出周旋夏等後事甚力越十年而卒金芝與董德欽聯名被捕亡命不知所之劍鏢閉戶不出以遺民終夏

國朝

賜入忠義祠

王家勤字白一號石雁鄞縣人以諸生貢入太學預於六狂生之目及督師錢肅樂起兵與王之仁將赴江上迎魯王監國謝三賓潛招兵於翠山人皆疑之家勤謂肅樂曰公等竟欲西行乎肅樂驚曰計將安出家勤曰浙東沿海皆可以舟師達鹽官五代錢氏嘗由此道會黃晟之師儻彼乘風而渡北來搗巢列城且潰矣非兵留守不可肅樂從之由是三賓翠山之衆乃不敢動家勤監國授大理評事江上破家勤與華夏等議分道集

兵夏主中甄而屠獻宸以內應之兵佐之馮家楨主西
甄而李長祥以東山之寨相援楊文琦弟兄主西南甄
則大蘭之師也家勤曰吾願主東南甄乃踰姜山之管
江管江之寨施邦炳杜懋俊等招姜山之死士得三千
人家勤至屠牛醺酒刺血誓師軍容甚壯約舟山水師
入關而家勤由陸路自城下會之未幾謝三賓告變直
指使者遣諜者入管江家勤曰耳目有異搜諜者得其
檄斬之鳴鼓會衆將由大嵩入海定海將軍常得功已
遣水師扼入海之路而以輕兵掩管江邦炳懋俊請據
險格關別令死士護家勤入海中道被執家勤之自管

江出也有顧甲隨之亦被執三賓舊識其人密以賂入
令甲進之家勤勸其多引薦紳人望以自免家勤斥之
甲乃私填一紙如都御史高斗樞父子主事李桐父子
及范兆芝等以與獄吏夏聞而驚曰石雁寧有此訊之
乃知甲所爲也三賓私謂人曰王石雁沈靜淵默粹不
能窺其際是非華嘿農之疏衷者比也必不可活未幾
移家勤之囚於錢唐或以爲有生望矣家勤曰吾亦何
望爲覆巢之完卵哉華楊施杜不可負也及累訊瞠目
不復一語遂以六月二十日行刑

張夢錫字雲生鄞縣人諸生預於六狂生之目魯王監

國授兵部司務參督師錢肅樂軍事時肅樂幕下皆文士惟張煌言善謀畫夢錫善鬪軍中呼曰大張君小張君進屯田主事兼御史江上破夢錫挈殘卒五百人軍於大皎山煌言亦軍於平岡兩軍相望寨中有呼之曰大張軍小張軍監國入聞夢錫納貢不倦庚寅

大兵四出搜山攻大皎夢錫挾長矛出鬪相持數日力不能敵遂鬪死五百人死其中突圍而出者三入翌日有負夢錫尸堊之大皎之南麓者則前突圍而出之三人也

毛聚奎字象來號文坦鄞縣人以諸生貢太學預於六

狂生之目參督師錢肅樂軍事魯王監國授戶部郎中
司餉行營將士爭求識所謂六狂者聚奎笑語之曰夫
狂不量力之謂也量力則愛身愛身則君父不足言矣
謝三賓是也江上破預山寨事累遭名捕行遁十餘年
及老病歸卒於家六狂生之幸得終牖下者聚奎一人
而已

外史曰六狂生於勝國非有折圭裂土之寵而必欲濡
首沒趾以相報者所爲不已過乎論者皆咎其疏防不
密致同盟駢首之禍雖然當日事勢豈能遽遂其所謀
者文謝之敗於空坑安仁亦不過存一匪石不轉匪席

不卷之心以求不媿君臣大義而已邊計及夫利害也

傳第七之二

魯之春秋卷十七

海鹽李聿求學

山寨二

屠獻宸

董德欽

楊文瓚

父秉龍等

高斗樞

子字泰等

李

桐子鄴嗣

屠獻宸字天生鄞縣人諸生南都破獻宸之蕭山探杭
州消息聞潞王降而歸道出餘姚值督師孫嘉績起兵
獻宸謁軍門嘉績畱之參軍事會師江上獻宸募兵爲
小營軍於瓜里魯王監國授車駕主事江上破歸海道
中營遊擊陳天寵仲謨二人故降將也獻宸瞰其異令

客說之天寵與謨詣獻宸密室曰吾二人故史閣部摩
下也當江都失守史公垂死遺言屬吾輩無負國家吾
二人敢忘之哉將有所待而爲之以報史公吾觀公非
凡人一切往來蹤跡吾亦稍覺之公若弗疑願効死力
獻宸聞之大喜天寵與謨卽從衣領出史公牒示之曰
儻城下有警吾縛兵備道以與公矣獻宸以告職方主
事華夏推官董德欽夏與德欽謀再乞師於舟山內外
合約以復浙東盟於獻宸家天寵與謨預焉已而舟山
許夏出師刻期遂欲合諸道之師大舉而獻宸以天寵
等兵爲內應德欽曰諸軍旣入城吾請任其餉乃盡斥

賣其家貲以待先一日謝三賓知之告變諸道之師皆
爲

大兵所截不得進舟山師次城下天寵與謨秣馬猶思
應之海道孫枝秀登陴以望駭曰海師翹首望城上而
不發一矢望內應也卽調兵分守諸門居民敢出衢巷
瞻眺者擊殺之天寵與謨不敢發舟山兵知有備次日
遽去而海道亦不敢遣兵追之者懼內變也獻宸與德
欽走天台初獻宸等之聚謀也夏忼爽而疏獻宸與德
欽皆戒之曰同里中有陰賊者宜防之夏不甚用其言
至是爲三賓所告海道遣兵大索追及獻宸德欽於天

台執之夏之入獄也已獨承其事謂獻宸等皆不與謀
及大訊鄣之諸義士聚議亦以夏爲首必不得活而獻
宸等皆尙可免况夏旣獨承則獻宸等不妨養身以有
爲乃私行賂於直指而密以書告獻宸等令弗爲過激
之語獻宸與德欽諾之獨推官楊文琦不可直指遂坐
華楊以死亦欲免屠董而爲三賓所持不克獻宸坐獄
中謂德欽曰華君不用吾二人之言以至此也德欽與
夏最善至是亦頗咎之夏以畏死誚之高宇泰遣人謂
夏曰君極欲同志得全卒成王事今何不廣乎夏謝之
獻宸德欽旣不能免與夏同日死臨刑夏欣然曰吾與

一君當其成長虹矣監國駐舟山贈獻宸大理寺丞德
欽兵部郎中德欽字若思獻宸同邑諸生南都破納衣
巾文廟慟哭尋佐督師錢肅樂募兵輸餉監國授監紀
推官獻宸

國朝

賜謚烈愍

楊文瓚字贊玉號圓石鄞縣人父秉鼐字公鼎魯王監
國駐紹興秉鼐親帥長子文琦次子文琮文瓚文球從
軍江上監國授秉鼐監紀推官江上破遣子聯絡山寨
往來海上而忠義之志不衰文瓚崇禎十二年舉鄉試

監國授御史時唐王頒詔至文瓚主受言閩浙宜合不宜分使主上屈節于天興將來無損于配天之業此議出廷臣大有異同簡討張煌言出竭力排之文瓚乃入閩唐王召對言當聯絡閩浙以爲同仇不當啟爭端閩強而浙弱莫若輸閩餉以助浙自足以報其心唐王然之卽賜食撤御前燈送之邸丙戌春以溫陵饑按視疏發帑金三千賑給回閩陳四難十失諸奏議唐王特擢巡撫雲南方辭請如前旨得領餉入浙中以圖會師鄭芝龍尼之不果乃命文瓚掌貴州道扼防建延三關便宜行事召募義勇初文瓚至閩其兄文琦亦同行文琦

字瑤仲號楚石對策言今日宜作馬上天子未可徃承
平積習唐王奇之以明經上等卽授惠安訓導尋加監
紀推官視惠安諸軍及僊霞嶺告唐王敗文瓚與文琦
乃歸監國至閩次長垣浙中寧紹台山寨四起文琦入
大蘭山與職方王翊合軍職方華夏乞師與舟山黃斌
卿強許之夏復令文琦往斌卿許之夏密謀刻期將集
大舉所致大蘭帛書中途爲謝三賓所得密揭告變並
列文瓚文球于其中或勸之逃文琦曰吾以義動而臨
難不赴且將陷父于辟安用義爲然偕死亦無益吾獨
承之因遣文瓚文球入閩文瓚不可乃獨遣文球變服

走文琦就訊慷慨無卮言但言文瓚不預謀釋之以養父而自請速死時夏已獨承帛書中事欲盡脫諸同難者而文琦獨不可當事遂議坐文琦而釋文瓚文琦與夏同死既殯文瓚妻張氏謂文瓚曰難猶未已可速去文琮亦曰弟但去有我在文瓚不從三賓復以賄屬當事必殺之乃復逮文瓚大呼高皇帝不絕以死三賓嘗與秉彝同學及其反覆兩朝之間文琦兄弟不復以父友事之故禍最烈監國駐舟山文琦贈兵科都給事中
文瓚右僉都御史文琮字天璧文球字天琅監國在紹興文琮官職方主事文球官都督府都事文球之入閩

也調大學士劉中藻於福安中藻曰祝君爲王元德之
弟仲德則老夫幸甚令參軍事時文球尚未娶中藻欲
婚之曰謝三賓讐首未懸未可也中藻益重之明年福
寧破文球死之文琮欲探監國消息時入兵部侍郎張
煌言軍中煌言初與文瓚不合及文瓚弟兄殉難煌言
遺書謂一門忠節如此當日悔其參辰及文琮至煌言
把臂痛哭盡釋前疑命文琮聯絡中土事自是文琮每
歲往來海上不絕秉藁亦不以前禍爲戒勉以善成家
風舟山破而海上之局日削文琮悲憤益甚癸卯秉藁
卒是年有卒降自海上言文琮引海上將趙彪爲患大

吏命捕文琮械至錢唐文琮歎曰吾父以天年終吾可
死矣且吾固雁行中漏網也賦絕命辭有憑誰痊我孤
山上魄是梅花鶴是魂扼吭而卒墓湖南山寺苑庶弟
文珽文玠暨諸姪以文琮故遣戍斃于道一門遂盡文
瓚

國朝

賜謚烈愍文琦

賜入忠義祠

高斗樞字象先鄞縣人光祿寺署丞勳子崇禎元年舉
進士授刑部主事坐議巡撫耿如杞獄與同列四人下

詔獄尋復官進員外郎稍遷荊州知府長沙兵備副使
長沙止老弱衛卒五百又遣二百戍攸縣城庫雉堞盡
圯斗樞建飛樓四十大脩守具臨藍賊艘二百餘由衡
湘抵城下相拒十餘日乃引去轉攻袁州遣都司陳上
才躡其後賊亦解去尋擊殺亂賊劉高峰等撫定餘衆
有詔錄其功巡撫陳膚謨大征臨藍寇斗樞當南面大
小十餘戰賊盡平詔資銀幣累進按察使移守鄖陽十
四年八月視事撫治王永祚以襄陽急移師鎮之鄖陽
被寇十載屬邑有六居民共四千游擊劉調元兵不滿
三千老弱居半不能當賊降將王光恩屯均州惠登相

屯興安皆兵強敢戰光恩兵三千尤強其驍壯五百皆
可一以當百斗樞以恩結之無何張獻忠自陝引而東
斗樞令光恩及其弟光興分扼之戰頻捷李自成陷襄
陽均州將攻鄖斗樞遣降將苗時化以二十小舟鳴礮
擊其舟賊知有備乃退十五年冬自成令羅汝才攻鄖
斗樞患火藥將盡令多造捱牌於城以禦矢石拆毀都
司署地板以共用得痊地火藥數十甕有石碑刻識云
門內馬奴子矢羅掛灘頭等語斗樞得之大喜賊知城
中礮盡外攻益力晝斗樞跪縛象於木牌遶城呼且罵
以脅降斗樞令諸軍嚴守陰裝諸礮未發賊調諸賊赴

城旌旗人馬蟻附一鼓百道並進城頭千礮齊發死者
萬數賊大驚遁失精銳過半由是鄖兵之名著於三楚
時自成殺汝才乃知識云門內馬鬪也羅掛灘頭殺羅
汝才掛首馬白灘也斗樞招汝才所部驍將楊承祖降
更名楊明起明年春自成憤甚復發兵至斗樞遣兵擊
之於楊谿賊抵龍門夜聞漢江水石相搏有驚呼者曰
鄖兵至矣賊遂潰五月斗樞召劉調元旬日殺賊三千
餘級自成遣將來攻卒不克而去乃令光恩復均州調
元下光化躬帥將士復穀城將襲襄陽聞孫傳庭敗旋
師均州復爲賊有十七年正月自成遣將路應標以三

萬人攻鄖斗樞密遣楊明起夜以千人渡漢破均州燒其積聚賊乏食鄖圍始解當是時自成已據全秦河洛荆襄皆陷鄖陽路斷孤城懸絕自十五年冬撫治王永祚被逮命李乾德郭景代之路絕不能至中朝謂鄖已陷不復設撫治十六年夏斗樞爲蠅書上疏請兵命善泗水者從水門出走關下繼登聞鼓上之始知鄖存廷議巡撫鄖陽卽任斗樞而陳演與之有隙乃擢知府徐啟元爲右僉都御史任之斗樞加太僕少卿路阻亦不達是年二月朝議設漢中巡撫兼督川北諸軍務擢斗樞右副都御史以往朝命亦不能達至三月始聞太僕

之命卽以軍事付啟元七月而京師之變聞并聞漢中
之命時路應標又至斗樞復登陴助啟元城守及自成
敗圍鄖者殺應標而去斗樞曰先帝以秦中屬臣豈可
寒此末命乃分鄖兵之半趨漢中苗時化楊明起等皆
從步騎五千將達漢中前有人騎滿谷斗樞使問來者
何兵則答以秦中豪傑不附賊與夫賊中亡逸而出者
也亦問入陝者何人曰漢中巡撫高公也人騎列拜馬
前問其姓名則曰喬商周李守恒陳世法皆自賊中來
所部人人思殺賊先後至者二萬人斗樞喜遂與下興
安山行十餘日遇

大兵收陝西訊之乃知

大清順治二年也問李賊何在曰敗走湖廣矣諸將愕然斗樞與議所向商周曰戰耳莫問爲誰也斗樞曰吾奉命討賊賊已遁無可立功不若歸鄖再議商周曰孰謂公大丈夫者商周不能復事公矣再拜而去斗樞至鄖鄖已內附慟哭曰孤臣以一隅爲擊叛之守豈知無益於天下之大數也入山竄處不歸福王立移斗樞巡撫湖廣代何騰蛟復以道路不通改用王驥斗樞亦不聞也南都破斗樞子宇泰佐督師錢肅樂起兵魯王監國授宇泰武選員外郎尋以奉使還里而江上破江上

既破凡遠宦於故國者例簿錄其赤口斗樞父翹年八十有餘事聞斗樞乃閒道歸御史黃宗義見之勸以大舉兵以復監國之故疆山寨之役斗樞與弟斗權斗魁及宇泰預之丙戌冬蠟書自海上至謀者得之宇泰被逮戊子職方華夏事洩斗樞與宇泰並繫杭州獄辛卯幾復被逮壬辰宇泰復繫獄皆得脫斗權字辰四爲諸生有盛名斗樞入獄斗權竭力救之獄始解晚年壁立瓶齧縕袍敝屣泊如也工古文簡貴有法斗魁字旦中後從黃宗義講學其弟宗炎下獄幾死者數矣斗魁百計出之嘗游杭州見昇棺過者血漉於地曰是未死歟

棺與以藥果甦由是稱高且中能起死人斗魁喟然曰
吾始有志於姚江蔽山之傳既而從事於詩古文詞今
乃以方技顯乎遂一意講學未幾卒字泰字虞尊號藥
菴在獄中彈琴不輟仁和令聞琴聲異之使人載酒邀
與共飲自後隔三日必與同飲及獄解遣人謝之竟不
往謁也晚集遺老爲詩社稱南湖九子

李桐字宗海號韋菴鄞縣人崇禎十年成進士授潮陽
知縣有惠政以薦入都召見賜白金帝欲擢入臺諫會
畿輔被兵守令乏人首輔周延儒外之改知永清縣永
清被兵人戶空虛桐還定安招集未十月而延儒獲罪

帝召入欲大用而京師陷關南歸思留身以有爲者
福王立馬士英遣人從橐索賂不得乃命浙之巡按任
大成疏糾橐從賊欲入之六等爰書以事無據而止魯
王監國召橐擢儀制主事尋歸丁亥山寨之謀大起橐
亦預焉華夏等爲謝三賓所告皆被執三賓謂其客曰
盃城士大夫讐我矣當一網盡之明年正月初七日復
以橐與都御史高斗樞等爲首被逮至錢唐入獄橐與
斗樞誓死嘿不出一語旣而得釋出獄斗樞曰幸脫虎
口之中非始願所及也橐曰吾前此不欲隕黑弁耳今
得見白日而死可矣遂絕粒不食數日卒斗樞嘆曰吾

媿之矣。桐子鄴嗣名文允，以字行。聞父被執，追之亦囚於馬櫪中。七十日得脫，而君父之感終不能釋。再下獄，得不死。其後苦節自勵，終身不出詩文。高華曲折，絕出流輩。學者稱杲堂先生者也。

外史曰：屠董諸楊皆世臣之裔，其報國被殲不可謂不慘。然而爲故國增重矣。高李兄弟父子死生雖不同，而志則同也。其荼苦艱貞亦足與楊氏諸臣並垂不朽矣。

傳第七之三

魯之春秋卷十八

海鹽李聿求學

山寨三

王

翊蔣士銓等

李長祥

王在等

馮家禎

馮堯

施邦煊

杜懋俊等

章欽臣

沈之泰等

馮京第

沈爾緒

王翊字完勳號篤菴慈溪人遷居餘姚補諸生魯王監國駐紹興知縣王正中薦之授職方主事與戶部主事王江請出募兵沿海招集聞江上師潰翊遂結寨於大蘭山評事董志寧職方華夏謀引翊軍下寧波翊大喜

丁亥十一月夏所貽大蘭帛書中途爲謝三賓所得告
之夏下獄

大兵急搗大蘭翊先攝軍避之戊子正月還軍大蘭三
月翊帥前鋒將軍王岳壽破上虞殺其知縣劉方至軍
聲大振當是時山寨繼起都御史李長祥軍於奉化之
夏蓋簡討張煌言軍於上虞之平岡都督章欽臣軍於
會稽之傅山御史張夢錫軍於鄞之大皎給事中徐孚
遠軍於定海之柴樓其餘蕭山石仲芳會稽王化龍陳
天樞顧虎臣台州俞國望金湯奉化吳明奎袁應彪浙
西之湖州柏襄甫亦應之至於小寨支軍以數百皆以

恢復爲辭爲監國聲援然諸軍單弱不如翊軍蔓延於
四明八百里之內於是

大兵欲平山寨以翊爲的提督合寧紹台三府之軍由
清賢嶺而入翊合諸寨軍屯於丁山以待之久而弛

大兵猝至翊敗喪其卒四百人幾被執有孫悅者特來
救之翊得脫

大兵不能久駐山中翊軍得復振與御史馮京第合軍
守杜壘以巖險爲關

大兵募山民之團練者以爲前導破翊軍於杜壘關口
長驅而入翊獲其別將邵不倫而以四百人走天台乞

定遠將軍俞國望之兵沿海招集流亡二月復至萬餘人閒道入杜畧擊破團練

大兵失國練遂出山翊軍又復振已丑春又破上虞翊軍既盛設五營五司五營主軍翊統之不義之徒翊所決罰其甚者立致重典人人稱快五司主餉王江任之自年夏翊自上虞出徇奉化時奉化義軍吳明奎軍於公塘

大兵破之明奎奔之河泊所追將及之猝遇翊軍而戰大兵乃退六月監國至健跳翊發使奔問官守并致貢監國遣使拜翊河南道御史時左副都御史黃宗羲上

言諸營文則自稱都御史侍郎武則自稱將軍都督未
有三品以下者主上嘉其慕義亦遂因而命之惟王翊
不自張大僅授御史御史在承平時固爲顯要而非所
論於今日諸營小或不及千人大亦不過王翊一部今
品級懸殊以之相臨恐爲未便大學士劉沂春禮部尙
書吳鍾巒皆以爲然定西侯張名振持之不肯下初諸
營迎表皆由名振以達獨翊表不由名振而上名振不
樂曰侯王道長來吾爲上言之翊聞之曰吾豈受定西
侯鈴鍵哉是秋翊入朝監國於健跳進僉都御史當是
時監國以舟山爲行在石浦健跳爲畿輔彈丸黑子金

湯盡焉而

大兵不能遽攻舟山者慮山寨乘其後所以慮山寨者不在諸營而在甥或謂大帥曰山寨中皆喪職以嘯聚耳苟招之以高官可解散也會稽人嚴我公知之僞爲告身銀印請於大帥願充使大帥乃請於

朝以都御史充招撫使令徧歷浙東西諸山寨以抵舟山湖州柏襄甫會稽顧虎臣皆就撫我公將渡海發使者入四明山甥之前營黃中道言於甥曰田橫烹酈生是耶非耶甥曰當是時而烹之亦以洩其憤耳中道曰田橫不烹酈生於說降之時而歎之其志屈矣固願降

矣齊之士心已搖豈可復鼓其後始烹之不亦晚乎翊
曰君言正合吾意於是發使請我公入山欲烹之我公
不敢遽入先以便來中道遂醢之分於諸營我公夜遁
庚寅三月翊朝監國於舟山進兵部右侍郎兼故官八
月翊破新昌援虎山時大帥定計將攻舟山以不洗山
寨無以塞內顧乃大舉將軍金礪由奉化入提督田雄
由餘姚入會師大蘭軍帳彌漫三十里游騎四出仍用
團練兵爲導諸寨或降或竄翊累戰不能抗以親兵入
舟山馮京第以病不能行匿鸛頂山塢固與名振不相
能不樂居舟山辛卯聞

大兵三道出將攻舟山。翊曰：事急矣，請復入山集散。以爲援。七月，遂還山中。諸將死殆盡，傍徨故寨。山中父老勸令招兵。榆林曰：溪之間乃出奉化二十四日，有大星墜於故寨，野鷄皆鳴。父老憂之，是日也。翊將由奉化出天台，至北溪爲團練兵所執。同行者蔣士銓、石必正明知三人時大帥皆在定海，乃送翊至定海。神色自如。賦詩不輟。海道王爾祿延之入見，請觀絕命辭。授筆於翊。其結句平生忠憤血飛濺。降臣輔書畢，以筆摘爾祿面而出。每日從容東顧，掠鬢脩容。謂兵士曰：使汝曹得見漢官威儀也。八月十二日，總督陳錦訊之。翊坐地上。

曰無多言成敗利鈍皆天也十四日行刑羣帥憤翊積
年倔強聚而射或中肩或中頰或中脅翊不稍動如貫
植木洞胸者三尙不仆封額截耳終不仆乃斧其首始
仆梟其首於鄆城西門副使陸宇燧家書櫃中越十二年
故卒毛明山以奇計收之藏宇燧家書櫃中越十二年
宇燧之弟宇燦得之櫃中乃束蒲壅之士銓字右良嘉
善人諸生參翊軍事三年山寨破他人皆散士銓獨
依不去八月初五日先翊行刑賦絕命辭翊在獄爲文
祭之必正江都入明知餘姚人皆翊部將與翊同日受
刑皆不肯跪掠之使跪則跪向翊遂死翊旁中道亦翊

部將統領前營監國授左都督孫悅餘姚人結寨山中
翊丁山之敗悅聞之突出救翊翊走而悅中流矢死直
立不仆者累日翊弟翊丁亥翊駐軍大蘭

大兵購之急因翊以招翊翊不顧乃死之翊

國朝

賜謚烈愍

李長祥字研齋達州人而英毅喜談兵時張獻忠亂
蜀長祥練鄉勇躬擐甲冑以助城守崇禎十六年成進
士選庶吉士文選郎中沈自彰薦之請援劉之綸之例
破格不次用之使備督師之選首輔陳演欲引之爲私

人長祥不可故不得召賊日偏長祥上疏請急調寧遠
鎮臣吳三桂以兵拒戰都城有新進士袁匱者具將才
可令輔之而令密雲鎮臣唐通與臣從太行入太原歷
寧武雁門攻其後首尾夾攻賊可擒也帝下其議未上
而賊已抵昌平長祥上疏請急令大臣輔太子出鎮津
門以提調勤王兵皆不果行而京師破長祥爲賊所縛
遭擄掠乘閒南奔福王改御史巡視浙鹽而南都又破
因起兵魯王監國加右僉都御史督師西行而江上之
師又潰監國航海長祥以餘兵結寨上虞之東山且耕
且屯井邑不擾職方華夏聯絡布置長祥留監軍夏請

引舟山之兵連大蘭諸寨以定鄆慈翻城之師下姚江
會曹娥合偁山諸寨以下西陵僉議奉長祥爲盟主刻
期將集謝三賓告之

大兵急攻東山前軍章有功帥五百人出戰累勝
大兵以全力壓之不支有功被執拉脅決齒垂斃大罵
死有功會稽人時有千夫長十二人受

大兵指爲閒至是中軍汪彙與十二人期以次日縛長
祥入獻晨起十二人忽自相語柰何殺忠臣折矢扣刃
誓而偕遁汪彙追之不及長祥奔之奉化依平西伯王
朝先復募兵軍於夏蓋山一日泊舟山下有龍挾雷電

將升天蕩舟士卒皆懼長祥令發大礮擊之雷電愈甚
水起立長祥神色自如俄而晴霽監國駐舟山長祥入
朝加兵部左侍郎兼故官長祥陳請合朝先之衆聯絡
沿海以爲舟山衛張名振不說朝先不從其請及名振
殺朝先長祥僅而免是年舟山破乃亡命江督陳錦得
之京口都統金礪巡道沈澗力主殺之江督不可釋之
居山陰澗谷中大吏以爲不可測更安撫江寧初長祥
之在東山寨也寄其孥於上虞之趙氏及寨破相傳長
祥死寨中其妻黃氏聚其家人謀其死有僕婦曰文鸞
曰夫人當爲公子計以延李氏惡可死曰然則奈何曰

婢子死罪願代夫人以吾女代公子俟死於此夫人遽以公子去黃氏泣曰安忍使汝代吾死曰小不忍最害事速驅之而山中有羅吉甫者時遊長祥門下至是奔至曰夫人公子我則任之雖以死甘心焉黃氏抱其子畝拜吉甫且拜文鶯文鶯曰夫人休矣捕者行且至矣甫出門捕者至以文鶯去吉甫既匿黃氏知朝先之於長祥姻也乃以黃氏母子往則長祥已先在焉相見慟哭爲言文鶯一木納女子今若此而文鶯被逮居然以命婦自重見大吏不肯少屈莫不以爲眞夫人云而長祥之自爲山亡命也又與其妻失及居山陰其妻又自

海上至得再聚長祥羈江寧其妻已卒江督馬鳴佩陽
禮之而陰疑之曰是孑然者誰保之長祥微聞之時江
寧有閩秀姚淑善墨竹容色絕世號鍾山秀才長祥娶
之朝夕甚昵焉江督私謂人曰李公有所戀矣防之遽
疏未幾長祥乘守者怠竟逸去由吳門渡秦郵走河北
遍歷宣府大同復南下處百粵久之天下大定始至毘
陵築易臺以老焉時王江行遁踪跡有與長祥不謀而
合江字長升慈溪人監國授戶部主事與職方王翊善
連名上書請募沿海義勇勤王自効師甫集而監國航
海江與翊結寨山中翊駐大蘭練兵江駐杜壩司餉前

山中屯糧所收不足親往履畝而稅有額外擾民一粟者必誅故大蘭一軍之強甲於他寨御史馮京第張夢錫合軍駐蘭江總司三營餉而不闕已丑監國至健跳遣使擢戶科給事中進右僉都御史再進右副都御史監國在舟山賴江與翊之貢賦也庚寅九月

大兵攻大蘭翊以親入舟山江亦走大吏執江母以招之江削髮爲僧至杭州大吏得江喜甚盛爲館帳而防閑之未幾江母卒江買一妾昵之甚其妻李氏晨夕勃谿詬誶江及淫之吏而出之其妻亦攜臂登車歷數江隱微之過而去一日江遊湖上防守者以其妾在不疑

而江竟不知所往乃知向者特以術脫其妻也江旣脫
攜其妻復入海朝監國於金門甲午監定西侯張名振
入長江還舟山復爲江江與兵部侍郎張煌言駐
軍焉時有沈調倫者復起兵四明山中來迎江乃赴之
大兵攻之江中流矢死調倫亦兵敗死

馮家禎字吉人慈溪人崇禎四年成進士授屯田主事
歸魯王監國擢職方郎中監國航海家禎與族人薨結
寨於慈溪聯絡東山李長祥軍職方華夏下獄家禎與
薨皆被逮入獄得釋家禎結歌社則曼聲按拍無不絕
時邑人陳謨以無賴委署分巡道魚肉鄉里家禎登場

醜誅之謨大怒搆之再下獄以事近誣復得釋乃杜門
不出

施邦炆字仲茂鄞縣人指揮翰子少補諸生翰卒邦炆
應襲未上而國難作督師錢肅樂起兵邦炆毀家輸餉
肅樂薦之魯王監國許以左班從優換授部曹以病而
又未上江上破益鬱鬱不得志會職方華夏評事王家
勤思翻城以迎監國邦炆知之謂家勤曰吾招集城東
豪傑幾三千管江杜懋俊爲之魁其餉吾一人可任也
以之輔華公可乎家勤大喜及爲謝三賓所告邦炆在
管江家勤奔告邦炆城兵拒守力竭縱火焚寨拔佩刀

自刎死懋俊字英侯邦汾同邑人諸生以仗義聞世居
管江其地負山海結寨可固崇禎末流寇鼎沸沿海草
竊亦乘閒起懋俊乃謀於其叔兆祉請頒土團法於有
司遂以兵部勒族人分隊瞭野擊柝行夜間黨爲之安
堵而沿海諸村無不仿而行之者邦汾以翻城計謀於
懋俊懋俊大喜招集姜山之徒助之而金義山中有賣
炭趙翁者或言其精星象諳兵法懋俊親往致之置軍
中奉爲帥事洩城中邏者至懋俊梟邏者首據山立寨
鳴鼓起事而急遣家勤先入海定海大將軍常得功遣
舟師扼海口分兵直抵管江家勤中途被執懋俊與邦

焮兆祐據險而鬪三日矢石雨集夷傷殆盡寨焚懋俊
以家丁力戰頭目中矢如蝟重傷倚牆而斃尸立不仆
兆祐被執斫其首十二刀而後墜趙翁者或見其從烟
焰中飛去兆祐字承芝與懋俊邦焮時稱管江烈士而
趙翁於辛卯壬辰間猶以其術往來海上後亦死

章欽臣會稽人佐督師孫嘉績起兵魯王監國授都督
使治火器江上人呼曰大攻營欽臣之治火器製作甚
精御史黃宗羲請於嘉績願得此軍西渡嘉績命欽臣
汰其不中步伐者以授宗羲江上師潰欽臣與妻金氏
入傅山結寨金氏善用兵山中人呼爲夫人營寨破欽

臣與金氏被執死時餘姚沈之泰休寧趙立言皆結寨
山中之泰字魯瞻監國以明經授中書舍人寨破被報
問官欲脫之之泰曰死吾分也不願脫乃就刑立言與
江上諸生李國楹約攻江山以應監國於閏戊子正月
朔立言帥三百人克之國楹失期不至明日

大兵至立言迎戰殺傷數百人馬躓墮而死子楨恨國
楹甚至其家欲殺之爲

大兵所執與國楹同死

馮京第字躋仲號簞谿慈谿人巡撫天津元颺從子師
事劉宗周黃道周與復社諸人相切劘名列留都防亂

公揭元颺在天津有牆子嶺卻敵功京第佐之預有勞
焉帝錄之未及用而京師陷歸唐王以明經授監軍御
史唐王敗京第再預湖州起兵不克又歸乃聯絡海上
諸寨事職方華夏被執京第亡命入四明山中募兵與
職方王翊合軍守杜輿以應魯王監國於閩進兵部侍
郎杜輿破走舟山監定西侯張名振軍援吳勝兆至崇
明遇颺風爲

大兵所敗京第得脫乃逸戊子勸黃斌卿遣使至日本
乞師斌卿曰昔兵部尙書余煌有言曰此吳三桂乞師
之續也京第曰北都之變東南如故使其東南而失之

者是則乞師之害也今我無可失之地比之前者爲不
倫矣蠟卿於是使其弟孝卿偕京第往長埼島其王不
許登陸初日本有西洋人作亂日本發兵盡誅西洋人
當是時西洋人復仇大舶載礮而來與日本爲難日本
講解始退退一日而京第至日本方戒嚴於外國京第
朝服拜哭不已會日本東京遣官行部如中國巡方御
史顏頂坐藍輿京第致其血書撤斯瑪王謂長埼王曰
中國喪亂我不遑恤而使其臣哭於我國我國之恥也
與大將軍言之議發各島罪人京第還孝卿假商船留
長埼長埼多官妓皆居大宅無牆壁以綾幔分爲私室

每月夜每室懸琉璃燈諸妓各把琵琶以娛客綺靡之習中國所未有孝卿荒於色忘其爲乞師而來者見輕於其國其國出師之意亦荒矣己丑監國命京第再乞師於日本以左副都御史黃宗羲副之至長埭不得請而還庚寅京第再結寨於四明山之道巖

大兵破之京第走舟山辛卯舟山破京第歸復募兵故部復合同里沈爾緒亦募兵立寨京第與之合軍其餉爾緒獨任之甲午部將王昇降請導

大兵以往京第以病不能行在鶴頂山中昇跡之遂被執不屈死妻葉氏自縊死爾緒遁其後復募兵立寨丙

申攻大蘭山

大兵出擊爾緒兵敗被執死爾緒監國授總兵官

外史曰嗚呼

天朝爲天命所眷江南半壁且不支何有於浙東浙東
一道且不支何有於四明山寨諸臣耿耿未下者雖云
故國故君之感其如天意何然而稽古在昔不能不比
之厓山一輩人物又況出自祭酒布衣之士此其所以
難也